

四庫全書

集部

欽定四庫全書

集部
晦庵集
目錄
卷一

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣范來宗

謄錄監生臣李鳳丹

欽定四庫全書

集部四

晦菴集

別集類三 宋

提要

臣等謹案晦菴集一百卷續集五卷別集七卷宋朱子撰書錄解題載晦菴集一百卷紫陽年譜三卷不云其集誰所編亦不載續集明成化癸卯莆田黃仲昭跋稱晦庵朱先生文集一百卷閩浙舊皆有刻本浙本洪武初

取置南雍不知輯於何人今閩藩所存本則先生季子在所編也又有續集若干卷別集若干卷亦併刻之云云是正集百卷編於在手然朱玉朱子文集大全類編稱在所編實八十八卷合續集別集乃成百卷是百卷又不出在手矣別集之首有咸淳元年建安書院黃鑄序曰先生之文正集續集潛齋實齋二公已縷版書院建通守余君師魯好古博

惟搜訪先生遺文又得十卷以為別集其標
目則一仿乎前而每篇之下必書其所從得
是別集之編出余師魯手惟續集不得主名
朱玉亦云無考觀鏞所序在度宗之初則其
成集亦在理宗之世也此本為康熙戊辰蔡
方炳臧眉錫所刻眉錫序之而方炳書後題
曰朱子大全集不知其名之所始考黃仲昭
跋及嘉靖壬辰潘潢跋尚皆稱晦菴先生集

而方炳跋乃稱朱子故有大全文集歲月浸久版已磨滅則其名殆起明中葉以後乎惟是潢跋稱文集百卷續集五卷別集七卷與今本合而與潢共事之蘇信所作前序乃稱百二十卷已自相矛盾方炳手校此書其跋又稱原集百卷續集十卷別集十一卷其數尤不相符莫明其故疑信序本作百有十二卷重刻者偶倒其文而方炳跋則繕寫筆誤

失於校正也方炳跋又稱校是書時不敢妄
有更定悉依原本即續別二集亦未依類附
入頗得古人刊書謹嚴詳慎之意今通編為
一百一十二卷仍分標晦菴集續集別集之
目不相淆亂以存其舊焉乾隆四十四年四
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部四

晦菴集目錄

別集類三 宋

卷一

賦

詞

琴操

詩

卷二

詩

卷三

詩

卷四

詩

卷五

詩

卷六

詩

卷七

詩

卷八

詩

卷九

詩

卷十

詩

詩餘

卷十一

封事

卷十二

封事

卷十三

奏劄

卷十四

奏劄

卷十五

講義議狀劄子

卷十六

奏狀

卷十七

奏狀

卷十八

奏狀

卷十九

奏狀

卷二十

申請

卷二十一

申請

卷二十二

辭免

卷二十三

辭免

卷二十四

書時事出處

卷二十五

書時事出處

劄子

卷二十六

書
時事出處

劄子

卷二十七

書
時事出處

卷二十八

書
時事出處

劄子

卷二十九

書

時事出處

劄子

卷三十

書

問答

卷三十一

書

問答

卷三十二

書問答

卷三十三

書問答

卷三十四

書問答

卷三十五

書問答

卷三十六

書 辨答

卷三十七

書 問答論事

卷三十八

書 問答

卷三十九

書 問答

卷四十

書
問答

卷四十一

書
問答

卷四十二

書
問答

卷四十三

書
問答

卷四十四

書 問答

卷四十五

書 問答

卷四十六

書 問答

卷四十七

書 問答

卷四十八

書
問答

卷四十九

書
問答

卷五十

書
問答

卷五十一

書
問答

卷五十二

書 問答

卷五十三

書 問答

卷五十四

書 問答

卷五十五

書 問答

卷五十六

書
問答

卷五十七

書
問答

卷五十八

書
問答

卷五十九

書
問答

卷六十

書問答

卷六十一

書問答

卷六十二

書問答

卷六十三

書問答

卷六十四

書問答

卷六十五

雜著

卷六十六

雜著

卷六十七

雜著

卷六十八

雜著

卷六十九

雜著

卷七十

雜著

卷七十一

雜著

卷七十二

雜著

卷七十三

雜著

卷七十四

雜著

卷七十五

序

卷七十六

序

卷七十七

記

卷七十八

記

卷七十九

記

卷八十

記

卷八十一

跋

卷八十二

跋

卷八十三

跋

卷八十四

跋

卷八十五

銘

箴

贊

表

疏

啓

婚書

上梁文

卷八十六

祝文

卷八十七

祭文

卷八十八

碑

卷八十九

碑

卷九十

墓表

卷九十一

墓誌銘

卷九十二

墓誌銘

卷九十三

墓誌銘

卷九十四

墓誌銘

卷九十五上

行狀

卷九十五下

行狀

卷九十六

行狀

卷九十七

行狀

卷九十八

行狀

事實

年譜

傳

卷九十九

公移

卷一百

公移

續集

卷一

書問答

卷二

書問答

卷三

書問答

卷四

書問答

卷五

書問答

別集

卷一

書 以下時事出處帖

卷二

書 以下講學及雜往來帖

卷三

書

卷四

詩

題跋

卷五

雜著

卷六

公移

卷七

公移

晦菴集原序

彌穹壤道也凝之則存乎人人參三才繇斯道爾聖同
天賢修而儼之進乎聖矣六經道之輿也羣聖精蘊在
焉而孔子會其全宋大儒續孟氏之絕而朱子會其全
自羲農承傳以來廣大精微闡抉無遺盖濂溪洛關詞
猶渾淪朱子則說之詳下學上達階森牖豁學者能熟
復篤行之復性明倫而得所以為人體用該人已成入
賢望聖駸駸不自覺大造萬世功高往哲允矣不然求

捷而迷得體而遺用違道遠哉顧朱子之學於時輒禁
晦百餘年本朝表章士所服習一宗之無異學道乃大
明日中天矣其釋諸經四書外所著文若詩彙之總百
有二十卷亦無一語不出於道而為文且有體風行水
上天地至文視汗漫荒忽神施鬼設者懸絕志在覺人
故辭繁不殺布帛菽粟有餘溫與味焉蓋其平日居敬
窮理反躬實踐內外交養者無斯須間而心與天游肆
其發如此學士大夫不欲為賢聖君子而扭於詞人則

取彼置此可也欲為賢聖君子而華實兼者舍是奚讀
哉是集舊刻閩臬歲久刊闕且簡褻重大人難於蓄比
張憲副大輪白諸前巡按虞侍御守愚蔣侍御詔重刻
之省約版紙者什四方鳩工沐梨而胡憲使岳至躬總
校讎言之任董學潘憲副潢佐之羅憲副英陸憲副銓姜
僉憲儀劉僉憲案咸與有勞信泣亟促其成訖工僉謂
信宜序所以刻之意於乎朱子固言之道未嘗亡而人
實晦之明之是書廣布將天下入道之塗益光詭道異

說不得作雖為文者亦知輪轅徒飾之可愧思傳於道
而勿局以藝庶幾國家化成參贊之治不無少補迺弗
固辭嘉靖壬辰九月既望後學饒平蘓信書於閩之行
臺

欽定四庫全書

悔菴集卷一

宋 朱子 撰

賦

白鹿洞賦

白鹿洞賦者洞主晦翁之所作也翁既復作書院洞中
又賦其事以示學者其詞曰

承后皇之嘉惠宅廬阜之南疆閔原田之告病惕農扈
之非良粵冬孟之既望夙余駕乎山之塘徑北原以東

驚陟李氏之崇岡

地名李
家山

揆厥號之所繇得頽址於榛

荒曰昔山人之隱處至今永久而流芳

陳舜俞廬山記
云唐李勣字瀟

之與兄涉偕隱白鹿洞後為江州刺史乃即
洞創臺榭環以流水雜植花木為一時之勝

自昇元之

有土始變塾而為庠儼衣冠與弦誦紛濟濟而洋洋

廬山

記又云南唐昇元中因洞建學館置田以給諸生學者
大集乃以國子監九經李善道為洞主掌其教授江南

野史亦云當時
謂之白鹿國庠在叔李而且然矧休明之景運皇穆穆

以當天一軌文而來混念敦篤於化原乃搜別乎遺遊

盼黃卷以置郵廣青衿之疑問樂菁莪之長育拔雋髦

而登進

謹按國朝會要太平興國二年知江州周述乞以九經賜白鹿洞詔從其請仍驛送之六年以

洞主明起為蔡州褒信主簿旌儒學崇鄉校也

迨繼照於咸平又增修而固倦

廬山記又云咸平五年敕重修又塑宣聖十哲之象

旋錫冕以華其歸琛亦肯堂

而詒孫

郭祥正書院記云祥符初直史館孫冕以疾辭于朝願得白鹿洞以歸老詔從之冕未及歸而

卒皇祐五年其子比部郎中琛即學之故址為屋榜曰書堂俾子弟居而學焉四方之士來者亦給其食

茂草於熙寧尚茲今其奚論

廬山記熙寧中作已云鞠為茂草矣

夫既啓

余以堂壇友又訂余以冊書

尋訪之初得樵者指告其處客揚方子直遂贊興作

之謀既而劉清之子澄亦裒集故實來寄

謂此前修之逸迹復闕我聖之宏

撫亦既震于余衷乃謀度而咨諏尹悉心以綱紀吏竭

蹙而奔趨士釋經而敦事工殫巧而獻圖曾日月之幾

何屹厦屋之渠渠

事具呂祖謙伯恭所作書院記

山葱瓏而遶舍水汨

瀲而循除諒昔人之樂此羗異世而同符偉章甫之裁

裁抱遺經而來集豈顛眺聽之為娛實覲宮墻之可入

愧余修之不敏何子望之能給矧道體之無窮又豈一

言而可緝請姑誦其昔聞庶有開於時習曰明誠其兩

進抑敬義其偕立允莘摯之所懷謹卷顏之攸執彼青

紫之勢榮亦何心乎俛拾亂曰澗水觸石鏘鳴璆兮山
木萃尊枝相樛兮彼藏以修息且游兮德隆業茂聖澤
流兮往者弗及余心憂兮來者有繼我將焉求兮

感春賦

觸世塗之幽險兮攬余轡其安之慨埋輪而繫馬兮指
故山以為期仰皇鑒之昭明兮眷余衷其猶未替抑重
巽於既申兮徇耕野之初志自余之既還歸兮畢藏英
而發春潛林廬以靜處兮聞蓬戶其無人披塵編以三

復兮悟往哲之明訓嗒掩卷以忘言兮納遐情於方寸
朝吾屣履而歌商兮夕又賡之以清琴夫何千載之遙
遙兮乃獨有會於余心忽嚶鳴其悅豫兮仰庭柯之蔥
蒨悼芳月之既徂兮思美人而不見彼美人之修嫵兮
超獨處乎明光結丹霞以為綬兮佩明月而為璫悵佳
辰之不可再兮懷德音之不可忘樂吾之樂兮誠不可
以終極憂子之憂兮孰知吾心之永傷

空同賦

何孟秋之玄夜兮心慘戾而弗怡偃予軀之既寧兮神
杳杳兮寒閨雲屋掩而弗扃兮壁帶耿而夜光宕予魄
而不得視兮悵竚立其怔營靈修顧予而一笑兮懽並
坐之從容寐將分而不忍兮旦欲往而焉從春予衷之
廓落兮奄愁結而增忡超吾升彼崑崙兮路修遠而焉
窮忽憑危以臨睨兮歲廣寒與閨平風信真際之明融
兮又何必懷此夢也矢予詞以自寫兮盍將反予旆乎
空同

詞

虞帝廟迎送神樂歌詞

桂林郡虞帝廟迎送神樂歌者新安朱熹之所作也熹
既為太守張侯棊紀其新宮之績又作此歌以遺桂人
使聲于廟庭侑牲璧焉其詞曰

皇胡為兮山之幽翳長薄兮俯清流渺冀州兮何有春
茲土兮淹留皇之仁兮如在子我民兮不窮以愛沛皇
澤兮橫流暢威靈兮無外潔尊兮肥俎九歌兮招舞嗟

莫報兮皇之祐皇欲下兮儼相羊烈風雷兮暮雨

右迎神三章二章四句一章五句

虞之陽兮離之許皇降集兮巫屢舞桂酒湛兮瑤觴皇
之歸兮何許龍駕兮天門羽旄兮繽紛俯故宮兮一慨
越宇宙兮無隣無鄰兮奈何七政協兮羣生嘉信玄功
兮不宰猶彷彿兮山阿

右送神三章章四句

琴操

招隱操

淮南小山作招隱極道山中窮苦之狀以風切遁世之士使無遐心其旨深矣其後左大冲陸士衡相繼有作雖極清麗顧乃自為隱遁之辭遂與本題不合故王康据作詩以反之雖正左陸之誤而所述乃老氏之言又非小山本意也十月十六夜許進之挾琴過予書堂夜久月明風露淒冷揮絃度曲聲甚悲

壯既乃更為招隱之操而曰穀城老人嘗欲
為予依永作辭而未就也予感其言因為推
本小山遺意戲作一闋又為一闋以反之口

授進之併請穀城七者闋諸名勝相與共賦

之以備山中異時故事云

七者字當
作老人

南山之幽桂樹之稠枝相樛高拂千崖素秋下臨深谷
之寒流王孫何處攀援久淹留 聞說山中虎豹晝嗥
聞說山中熊羆夜咆叢薄深林鹿呦呦獼猴與君居山

鬼伴君遊君獨胡為自聊歲云暮矣將焉求思君不見
我心徒離憂

右招隱

南山之中桂樹秋風雲冥濛下有寒棲老翁木食澗飲
迷春冬此間此樂優游渺何窮 我愛陽林春葩晝紅
我愛陰崖寒泉夜淙竹栢含煙悄青葱徐行發清商安
坐撫枯桐不問簞瓢屢空但抱明月甘長終人間雖樂
此心與誰同

右反招隱

詩

遠遊篇

舉坐且停酒聽我歌遠遊遠遊何所至咫尺視九州九
州何茫茫關海以為壘上有孤鳳翔下有神駒驤孰能
不憚遠為我游其方為子奉尊酒擊鉢歌慨慷送子臨
大路寒日為無光悲風來遠壑執手空徬徨問子何所
之行矣戒闕梁世路百險艱出門始憂傷東征憂暘谷

西遊畏羊腸南轅犯癘毒北駕風裂裳願子馳堅車躡
險推其剛我我既不支瑣瑣誰能當朝登南極道暮宿
臨太行睥睨即萬里超忽凌八荒無為蹙蹙者終日守
空堂

擬古八首

離離原上樹戢戢澗中蒲娟娟東家子鬱鬱方幽居濯
濯明月姿靡靡朝華敷昔為春蘭芳今為秋蘼蕪寸心
未銷歇託體思同車

綺閣百餘尺朝霞冠其端飛閣麗遠漢曲楹何盤桓清
謠發徽音一唱再三歎借問誰為此佳人本邯鄲微響
激流風浮雲慘將寒為言何所悲遊子在河關不恨久
離濶但憂芳歲闌願為清宵夢燕昵窮餘歡

上山採薇蕨側徑多幽蘭采之不盈握欲寄道里艱沈
憂念故人長夜何漫漫芳馨坐銷歇徘徊以悲歎

佳月朗秋夜蟋蟀鳴空堂大火西北流河漢未渠央野
草不復滋白露結為霜梁燕起高飛雲鴈亦南翔念我

同心子音形阻一方不念執手歡隔我如參商寓龍不
為澤畫餅難充腸金石徒自堅虛名真可傷

鬱鬱澗底樹揚英秋草前與君結歡愛自比金石堅金
石終不渝歡愛終不踈一夕遠離別悠悠在中途相思
未云變音容定何如傷彼三春蕖灼灼層華敷盛時不
可留恐逐嚴霜枯夫君來何晚賤妾長離居

高樓一何高俯瞰窮山河秋風一夕至憔悴已復多寒
暑遞推遷歲月如頽波離騷感遲暮惜誓閔蹉跎放意

極驩虞吐此可奈何邯鄲多名姬素豔凌朝華妖歌掩
齊右緩舞傾陽阿徘徊起梁塵綵絲紛衣羅麗服東奇
芬顧我長咨嗟願生喬木陰寅緣若絲蘿

夫君滄海至贈我一箇珠誰言君行近南北萬里餘結
作同心花綴在紅羅襦雙垂合歡帶麗服春微軀為君
一起舞君情定何如

衆星何歷歷嚴宵麗中天殷憂在之子起步荒庭前出
門今幾時書札何由宣沉吟不能釋愁結當誰憐臨風

一長嘆淚落如奔泉

題謝少卿藥園二首

自此詩至卷終先生手編謂之收齋淨業

謝公種藥地窈窕青山阿
青山固不羣花藥亦婆娑
一掇召冲氣三掇散沉疴
先生澹無事端居味天和
老木百年姿對立方嵯峨
我持此供日夕不樂復如何

小儒忝師訓迷謬失其方
一為狂瘖病望道空茫茫
頗聞東山園芝朮緣高岡
瘖聾百不治效在一探囊
再拜

藥園翁何以起膏肓

瘖一本作醒

邵武道中 同前詩起辛未

風色戒寒候歲事已逶遲勞生尚行役遊子能不悲
林壑無餘秀野草不復滋木叅經秋成收斂已空畦
田翁喜歲豐婦子亦嘻嘻而我獨何成悠悠長路歧
凌霧即曉袞落日命晚炊不惜容鬢凋鎮日長空饑
征鴻在雲天浮萍在青池微蹤政如此三歎復何為

友人黃子衡欲之上庠以詩留行

若士有奇操久厭山林卑奮衣十里道已與親友辭
子

行何悠悠世路方如茲歸來亦何日車馬光陸離幽蘭
生前林擢置白玉墀不以芳意遠結根終不移願子崇
明德潛躍貴因時悲風靜夜聽喬木歲寒姿何以迴軒
駕千載相與期

奉酬丘子野表兄飲酒之句

微褐不充體寒夜懷重衾古來窮廬士歲暮多苦心苦
心亦何為世路多崎嶇不藉盃中物離憂坐自侵舉杯
當勿辭何為復沉吟醺酣遺所拘神慮契遐襟荒酒思

前戒歡謠發清音雅唱一何高仰酬非所任申章聊敘
報洪量亦余欽

丘子野表兄郊園五詠

欲識淵明家離離踈柳下中有白雲人良非避世者柳

結援遂芳植覆牆擁深翠還當具春酒與客花下醉茶
藤

移自溪上園種此牆陰路牆陰少人行來歲障幽戶竹

芭蕉植秋檻勿云憔悴姿與君障夏日羽扇寧復持芭
蕉

花柳遶宅茂先生在郊居下帷良已苦時作帶經鋤疏
圃

古意

兔絲附撲撒佳木生高岡弱蔓失所依佳木徒蒼蒼兩
美不同根高下永相望相望無窮期相思諒徒為同車
在夢想忽覺淚沾衣不恨歲月適但惜芳華姿嚴霜萎
百草坐恐及茲時盛年無再至已矣不復疑

送劉旬甫之池陽省覲六十四丈遂如行在所
上計

雨雪成歲暮之子遠徂征酌酒起相送慨我別離情池

陽實大藩佐車屈時英子行一請覲上計趨吳京良玉
懷貞操芳蘭含遠馨臨歧一珍重即此萬里程

晨起對雨二首

淒冽歲云晏雨雪集晨朝高眠適方起四望但蕭條遠
氛白漫漫風至林靄消流潦冒荒塗清川亦迢迢遐瞻
思莫窮端居心自超覽物思無託即事且逍遙

晨起候前障白煙眇林端雨意方未已后土何時乾倚
竹聽蕭瑟俯澗聞驚湍景物豈不佳所嗟歲已闌守道

無物役安時且盤桓翳然陶茲理貧悴非所歎

殘臘

殘臘生春序愁霖逼歲昏
小紅敷艷萼衆綠被陳根
陰壑泉方注原田水欲渾
農家向東作百事集柴門

客舍聽雨

士申

沈沈蒼山郭暮景含餘清
春靄起林際滿空寒雨生
投裝卽虛館簷響通夕鳴
遙想山齋夜蕭蕭木葉聲

宿武夸觀妙堂二首

陰靄除已盡山深夜還冷獨臥一齋空不眠思耿耿聞
來生道心妄遣慕真境稽首仰高靈塵緣誓當屏
清晨叩高殿緩步遶虛廊齋心啓真祕焚香散十方出
門戀仙境仰首雲峰蒼躊躇野水際頓將塵慮忘

社日諸人集西岡

郊原腴芳物細雨青春時前岡遐敞地登覽情無遺農
畝懷歲功壺漿祝神釐我慙里居氓十載勞驅馳今朝
幸休閒追逐聊嘻嘻笑語歡成舊盡醉靡歸期

久雨齋居誦經

端居獨無事聊披釋氏書
暫釋塵累牽超然與道俱
門掩竹林幽禽鳴山雨餘
了此無為法身心同晏如

新竹

春雷殷巖際幽草齊發生
我種南窓竹戢戢已抽萌
坐獲幽林賞端居無俗情

雨中示魏惇夫兼懷黃子厚二首

讀書春日晏雨至滿郊園
一灑幽叢竹藹藹清陰繁
齋

居無還往鎮日空掩門欲將冲靜趣與子俱忘言
暄風變春餘卉木日葱蒨林間一雨來滿庭寒草徧寂
寞謝朋儔晤語懷雋彥良無一水遥阻濶何由見

夜聞子規

幽林欲雨氣含淒春晚端居園徑迷獨向高齋展衾臥
南山夜夜子規啼

杜門

杜門守貞操養素安冲漠寂寂闕林園心空境無作細

雨被新筠微風動幽籜聊成五字句吟罷山花落浩然
與誰期放情遺所託

宿山寺聞蟬作

林葉經夏暗蟬聲今夕聞已驚為客意更值夕陽曛

晨登雲際閣

晨起踏僧閣徒倚望平郊攢巖夏雲曉蒼茫林影交暫
釋川途念憩此煙雲巢聊欲托僧宇歲晏結蓬茅

池上示同遊者

藕葉蓋波面池花猶未紅聊承曉露餘散步詠涼風香
氣已飄忽客懷誰與同唯應同遊子芳意更匆匆

過黃塘嶺

屈曲危塍轉沉陰山氣昏蟬聲高樹暗石瀨淺流喧已
過黃塘嶺欲覓桃花源無為此留滯驅馮踰山樊

宿白芒畬

早發招賢里夜宿白芒畬川暝前山雨風驚澗樹花途
陸綿異縣曛黑泊田家逢人聊問路猶恨去程賒

濯足澗水二首

濯足澗邊石山空水流喧行旅非吾事寄此一忘言
澗邊濯足時修途倦煥振策欲尋源山空無往躅

自溪口買舟至順昌示同行者

時燠倦長途買舟至西郭煙波方渺然坐此溪上閣子
留且歡宴我去成蕭索同行不同調此意誰與託

宿貧當鋪

庭陰雙樹合牕夕孤蟬吟盤礴解煩鬱超搖生道心

倒水坑作

窮幽鮮外慕，殖志在邱園。即此竟無得，空恨歲時遷。川
陸綿半載，煩燠當歸緣。憇此蒼山曲，洗心聞澗泉。

夏日二首

夏闕
半林陰方澹，然鳴蟬咽餘響。池荷競華鮮，抱
痾守窮廬。釋杯趣幽禪，即此窮日夕。寧為外務牽。

雲臻川谷暝，雨來林景清。齋舍無餘事，涼氣散煩纓。望
山懷釋侶，盥手閱仙經。誰懷出塵意，來此俱無營。

對雨

虛堂一遊矚驟雨滿空至的皪散方塘冥濛結雲氣勢
逐風威亂望窮山景翳煙靄集林端蒼茫欲無際涼氣
襲輕裾炎氛起秋思對此景淒淒還增冲澹意

齋居聞磬

幽林滴露稀華月流空爽獨士守寒棲高齋絕羣想此
時隣磬發聲合前山響起對玉書文誰知道機長

又聞琴作

瑤琴清露後寥亮發牕間韻逐回風遠情隨玄夜闌端
居獨無寐林扉空掩闕起望星河落哀絃方罷彈

讀道書作六首

巖居秉貞操所慕在玄虛清夜眠齋宇終朝觀道書形
忘氣自冲性達理不餘於道雖未庶已超名跡拘至樂
在襟懷山水非所娛寄語狂馳子營營竟焉如

失志墮塵網浩思屬滄洲靈芝不可得歲月逐江流碧
草晚未凋悲風颯已秋仰首鸞鶴期白雲但悠悠

金
卷一
白露墜秋夕碧陰生夕涼起步廣庭內仰見天蒼蒼東
華綠髮翁授我不死方願言勤脩學接景三玄鄉

四山起秋雲白日照長道西風何蕭索極目但煙草不
學飛仙術日日成醜老空瞻王子喬吹笙碧天杪

鬱羅聳空上青冥風露淒聊乘白玉鸞上與九霄期激
烈玉簫聲天矯餐霞姿一回流星盼十載空相思

王喬吹笙去列子御風還至人絕華念出入有無間千
載但聞名不見冰玉顏長嘯空宇碧何許蓬萊山

秋雨

一雨散林表清陰生廣庭喜茲新秋夜起向高齋行煩
歎獲暫祛涼氛集華纓沉沉遠林氣愜此端居情節物
坐如此撫世襟方盈歸當息華念超遙悟無生

秋夕懷子厚二首

雨歇林氣爽月華湛遙暉齋居翫物變廓落滄洲期焚
香散碧虛撫節陳清詩抗志屬雲端非君諒誰知

涼氣沉齋宇夕陰未渠央寒棲屬遙夜長簟卷單床浮

雲蔽中天愁霖隔秋窓思君一晤對耿耿何能忘

病中呈諸友

窮居值秋晦抱疾獨齋居行稀草生徑一雨復旬餘交
親各所營曠若音塵疎始悟端居樂復理北窓書讀誦
興已闌起坐方躑躅綠樹滿空庭策策涼颺初良時不
復停煩吝未云祛還思對君子日夕佇軒車

川上見月歸示同行者

川上偶攜手皓月起林端一舒臨流望玄露已先溥歸

掩荒園扉更怯裳衣單清夜可晤言獨處誰為歡

月夜述懷

皓月出林表照此秋牀單幽人起晤歎桂香發窓間高
梧滴露鳴散髮天風寒抗志絕塵氛何不棲空山

冬雨不止

忽忽時序改白日藏光輝重陰潤九野小雨紛微微蒼
山寒氣深高林霜葉稀田家秋成意落落非所期曠望
獨興懷戚戚愁寒饑事至當復遣且掩荒園扉

贈仰上人

澗谷秋雲曉飄飄無定姿氛氲升遠樹凌亂起寒颼雨
罷成孤鶴天高逐散絲上人歸別嶺心迹但如斯

即事偶賦

白煙竟日起雨晦蒼山深老菊不復妍丹楓滿高林抱
病寢齋房窓戶結愁陰起望一抒情遐眺豁煩襟人生
亦已勞世路方崎嶇且詠招隱作無為名跡侵

作室為焚修之所擬步虛辭

歸命仰璇極寥陽太帝居
脩脩列羽幢八景騰飛輿
願傾無極光回駕俯塵區
受我焚香禮同彼浮黎都

寄題咸清精舍清暉堂

山川佳麗地結宇娛朝昏
朝昏有竒變超忽難具論
千嵐蔽夕陰百嶂明晨暎
穹林擢遙景回澗盪秋氛
覽極慚未周窮深遂忘喧
欲將身世遺况託玄虛門
境空乘化徃理妙觸目存
珍重忘言子高唱絕塵紛

冬日二首

蕭索時序晚已復度高秋回澗白波起通川絳樹稠晨
風散清霜嘉稻卷平疇獨懷志士感歲事幸將休

清霜染澗樹蕭索向嚴冬密雨有時集寒雲無定容波
明橫瀨出風急遠林空一極窓間眺高旻矗亂峰

春日即事

癸酉

郊園卉木麗林塘煙水清閒棲衆累遠覽物共闕情憇
樹鳥啼幽綠原草舒榮悟悅心自遣誰云非達生

誦經

坐厭塵累積脫躡味幽玄靜披笈中素流味東華篇朝
昏一俯仰歲月如奔川世紛未云遣仗此息諸緣

春日言懷

春至草木變郊園猶掩扉茲晨與心會覽物徧芳菲桃
萼破淺紅時禽悅朝暉泉谷暖方融原田水初肥東作
興庶忙歲功始在茲端居適自慰世事復有期終然心
所向農畝當還歸

晚步

東原鬱已秀嘉樹藹初綠衆卉發春陽前山可遐矚端
居日康健涉澗步墟曲景幽恣所尋悟悅何由足鳥鳴
華薄深泉響亂流續握手一同忻吾生詎幽獨

懷友

山夕煙景亂林空鳥啼幽懷人隔春江夢想積離憂覽
物懷悄悄臨觴但悠悠徘徊東西步晤歎復何求

山館觀海棠作二首

景暄林氣深雨罷寒塘淥置酒此佳辰尋幽慕前躅芳

樹麗煙華紫綿散清馥當由懷別恨寂寞向空谷
春草池塘綠忽驚花嶼紅亂英深淺色芳氣有無中置
酒賓朋集披襟賞咏同若非摹寫得應逐綵雲空

題畫

青鸞凌風翔飛仙窈窕姿高挹謝塵境妙顏粲瓊蕤登
霞抗玉音結霧吹參差神鈞儻空洞玄露湛霄暉山中
玉斧家胡不一來嬉真凡路一分冥運十年期

過武夷作

弄舟緣碧澗棲集靈峰阿夏木紛已成流泉注驚波雲
闕啓蒼茫高城鬱嵯我眷言羽衣子俛仰日婆娑不學
飛仙術纍纍丘冢多

同安官舍夜作二首

官署夜方寂幽林生月初閒居秋意遠花香寒露濡故
國異時節欲歸懷簡書聊從西軒臥塵思一蕭疎

窓戶納涼氣吏休散朱墨無事一脩然形神罷拘役暫
愒豈非閑無論心與跡

寄山中舊知七首

結茅雲壑外石澗流清泉澗底采菖蒲顏色永芳鮮
超世慕肥遯鍊形學飛仙未諧物外期已絕區中緣
客子歸來晚江湖欲授衣路岐終寂寞老大足傷悲
慷慨平生志冥茫造物機清秋鷗鷺上萬里看橫飛

晨興香火罷入室披仙經玄默豈非尚素餐空自驚
起與塵事俱是非忽我營此道難坐進要須悟無生

故園今夜半林影澹逾清曳杖南溪路君應獨自行
潺

卷一
溪流水思蕭索早秋聲盡向琴中寫焉知離恨情

采藥侵晨入亂峯宿雲無處認行蹤歸來應念塵中客
寄與玄芝手自封

淒涼梧葉變芬馥桂花秋日夕湖臯勝哦詩憶舊遊
秋至池閣靜天高林薄踈西園有佳處那得與君俱

述懷

夙尚本林壑灌園無寸資始懷經濟策復愧軒裳姿
官刀筆間朱墨手持謂言殫塞劣詎敢論居卑任小

才亦短抱念一無施幸蒙大夫賢加惠寬筭咎撫已實
已優於道豈所期終當反初服高揖與世辭

釋奠齋居

理事未逾月簿書終日親簡編不及顧几閣積埃塵今
辰屬齋居煩跼一舒伸瞻眺庭宇肅仰首但秋旻茂樹
禽轉幽忽如西澗濱聊參物外趣豈與俗子羣

試院雜詩五首

齋宇夜沉寂淒涼羣物秋臥聽簷瀉盡心屬故園幽了

事知何日分曹喜勝流
笑談真暫爾不敢恨淹留

寒燈耿欲滅照此一窓幽
坐聽秋簷響淋浪殊未休

窮秋一雨至暫止復蕭蕭
曲沼寒流滿空庭涼葉飄
聞

鐘懷故宇覽物屬今朝
一詠歸來賦頓將形跡超

長廊一遊步愛此方塘淨
急雨散遙空圓文滿幽鏡
堦

空綠苔長院僻寒飈勁
長嘯不逢人超搖得真性

藝苑門禁肅長廊似僧居
偶來一散步暫與塵網踈
文

字謝時輩銓衡賴羣儒
伊予獨何者偏仄心煩紆

巖柱

山中綠玉樹蕭灑向秋深小閣芬微度書帷氣欲侵披
懷清露曉遇賞夕嵐陰珍重王孫意天涯淚滿襟

秋懷

井梧已飄黃澗樹猶含碧烟水但逶迤空齋坐蕭瑟端
居生遠興散漫委書帙愛此北窓閒時來岸輕幘微鐘
忽迢遞禽語破幽寂賞罷一帽然淡泊忘所適

喜晴

衝颺動高柳淥水澹微波日照秋空淨雨餘寒草多放
懷遺簿領發興託煙蘿忽念故園日東阡時一過

夜賦

暗窓螢影亂秋幃露氣深羣籟喧已寂青天但沉沉惻
愴懷高侶幽默抱冲襟遙憶忘言子一寫山水音

曉步

初日麗高閣廣步愛修廊重門掩秋氣高柳蔭方塘闕
海冬尚溫晏陰天未霜坐悲景物殊亦念歲時荒故園

屬佳辰登覽遍陵岡
賓遊盡才彥蕭散屏壺觴
別來時已久懷思寧
暫忘宦遊何所娛要使
心懷傷

書事

重門掩畫靜寂無人境
喧嚴程事云已端居秋
向殘超
搖捐外慮幽默與誰言
即此自為樂何用脫籠樊

八月十七夜月

忽忽秋逾半清輝萬里同
遙知竹林夜共賞碧雲空
寂寞
冥盈尊酒淒涼滿院風
寒塘空自綠不似小園東

憶齋中二首

高齋一遠眺西南見秋山景翳夕陰起竹密幽禽還賞
愜慮方融理會心自閑誰料今為客寥落一窓間

蟋蟀亂秋草故園風露深何因不歸去坐使百憂侵

秋夕

秋風桂花發夕露寒螢吟歲月坐悠遠江湖亦阻深紛
思寧復整離憂信難任終遣誰為侶獨此澹冲襟

夢山中故人

風雨蕭蕭已送愁，不堪懷抱更離憂。故人只在千巖裏，
桂樹無端一夜秋。把袖追歡勞夢寐，舉杯相屬暫綢繆。
覺來却是天涯客，簷響潺潺瀉未休。

懷子厚

中夏辭故里，涉秋未停車。賓友坐離澗，田園想榛蕪。感
茲風露朝，起望一煩紆。春彼忘言子，鬱鬱西齋居。俯飲
蒼澗流，仰咏古人書。名應里閭薦，心豈榮利俱。琅然撫
枯桐，幽韻泉谷虛。褰裳欲往聽，乖隔靡所如。

南安道中

曉澗淙流急，秋山寒氣深。
高蟬多遠韻，茂樹有餘陰。
烟火居民少，荒蹊草露侵。
悠悠秋稼晚，寥落歲寒心。

垂澗藤

寒泉下碧澗，古木垂蒼藤。
陰此萬里流，間花自層層。
何人賞幽致，白髮巖中僧。

臨流石

偃蹇西澗濱，枵然似枯木。
下有幽泉鳴，上有蒼苔綠。
來

往定何人山空此遺躅

懸崖水

秋天林薄踈翠壁呈清曉迢遞瀉寒泉下有深潭悄時
飄桂葉來尋源路殊杳

穿林徑

屈曲上雲端似向崖陰斷行間山鳥鳴下與泉聲亂去
去不知疲幽林自成玩

九日

金史四庫全書 卷一
故國音書阻一方天涯此日思茫茫風煙歲晚添離恨
湖海尊前即大荒薄宦驅人向愁悴舊遊惟我最顛狂
細思萬石亭前事辜負黃花滿帽香

督役城樓

天高無遊氛林景澹餘暉感此霜露節但傷風土非
秋時序溫百卉不復腓祇役郊原上暄風一吹衣
身諒無補課督慙饑羸還憶故園日策杖田中歸

再至作

荒城一騁望落景麗譙門隱隱鐘猶度依依嵐欲昏風
霜非故里禾黍但秋原極目歸來晚茲懷誰與論

晚望

禾黍彌平野淒涼故國秋清霜凝碧樹落日翳層丘覽
物知時變為農覺歲適不堪從吏役憔悴欲歸休

苧溪道中

秋山有紅樹忽憶野田中禾黍收將盡氛埃晚欲空登
原悲落景倚杖怯高風更有寒塘水應將此處同

十月朔旦懷先隴作

十月氣候變獨懷霜露悽僧廬寄楸檟饋奠失茲時竹
栢翳陰岡華林敞神扉汎掃託羣隸瞻護煩名緇封塋
諒久安千里一歔歔持身慕前列街訓倘在斯

步虛詞二首

扉景廓天津空同無員方丹晨儻七氣孕秀東溟房餐
吐碧琳華仰喻飛霞漿竦轡絕冥外眇目撫大荒策我
綠軒駟上際於浪滄神鈞亦寥朗掩靄晨風翔養翮塵

波裏縱神非有亡一樂無終永千春詎能當

褰裳八度外竦轡霄上遊軒觀隨雲起偃駕東渟丘丹
萑耀瓊岡三素粲曾幽躡景遺塵波偶想即虛柔盼目
娛真際不喜亦不憂宴罷三椿期顛徊翳滄流十載何
足道太空自然儔

民安道中

祇役東原路長風海氣陰蒼茫生遠思僚慄起寒襟午
泊僧寮靜昏投縣郭深拙勤終不補誰使漫勞心

西郊縱步

西郊一游步極目是秋山積水羣峰碧清霜楓樹丹故
園心不展投策詎能閒且適平生意無令雙鬢斑

寄黃子衡

遠宦去鄉井終日無一歡援琴不能操臨觴起長嘆我
友客京都肅肅雲天翰別去今幾時各在天一端有酒
不同斟中情誰與宣裁詩一問訊重使心思傳

濯足萬里流

褰裳緣碧澗濯足憩清幽却拂千巖石聊乘萬里流氛
埃隨脫屣步武欲橫秋極目滄江晚煙波殊未休

孤鶴思太清

孤鶴悲秋晚凌風絕太清一為棲苑客空有叫羣聲天
矯千年質飄飄萬里情九臯無枉路從遣碧雲生

與諸同寮謁莫北山過白巖小憩

驟車陟修坂覽物窮山川疎林汎朝景翠嶺含雲烟祠
殿何沈邃古木鬱蒼然明靈自安宅牲酒告恭虔盼蠻

理潛通神蚪亦蜿蜒既欣歲事舉重喜景物妍解帶憇
精廬尊酌且留連縱談遺名跡煩慮絕拘牽迅晷諒難
留歸軫忽已騫蒼蒼暮色起反旆東城阡

懷山田作二首

郊園多所樂况此歲云暮寒色澹遙空清霜變紅樹欲
舒林表望詎識塵中趣向晚寂無人氤氳欲成霧

冬日

冰溪流已咽陰嶺寒方結忽值早梅春未忍芳心歇的
皦終自妍殷勤為誰折千里寄相思相思政愁絕

梅花

夜雨二首

擁衾獨宿聽寒雨聲在荒庭竹樹間
萬里故園今夜永
遙知風雪滿前山

故山風雪深寒夜只有梅花獨自香
此日無人問消息
不應憔悴損年芳

將理西齋

欲理西齋居厭茲塵境擾發地得幽芳
斲石依寒篠閒
暇一題詩懷冲獨觀眇偶此愜高情
公門何日了

寄題金元鼎同年長泰面山亭

抗心塵境外結宇臨秋山
乘高一騁望表裏窮遐觀
衆壑互攢列連岡莽縈環
陽崖煙景舒陰壑悲風寒
碧草晚未凋林薄已復丹
仙人吳門子歲晚當來還

冬至陰雨

愆陽值歲晏忽復層陰結
一雨散霏微千林共騷屑
端居遺薄領遠意懷幽潔
曠慮守微疴殊方感新節
豈伊田廬念邱壠心摧折
還登東嶺岡瞻竚何由歇

安溪道中泉石奇甚絕類建劍間山水佳處也
驅車陟連岡振轡出林莽霧露曉方除日照川如掌行
行遵曲岸水石窮幽賞地偏寒篠多澗激淙流響祇役
未忘倦心神暫蕭爽感茲懷故山何日稅征鞅

留安溪三日按事未竟

縣郭四依山清流下如駛居民煙火少市列無行次嵐
陰常至午陽景猶氛翳向夕悲風多遊子不遑寐我來
亦何事吏禁古所記奉檄正淹留何當語歸計

安溪書事

清溪流不極夕霧起嵐陰虛邑帶寒水悲風號遠林涵
山日欲晦窺閣景方沉極目無遺眺空令愁寸心

梅花兩絕句

溪上寒梅應已開故人不寄一枝來天涯豈是無芳物
為爾無心向酒杯

幽壑潺湲小水通茅茨煙雨竹籬空梅花亂發籬邊樹
似倚寒枝恨朔風

柚花 甲戌

春融百卉茂素榮敷綠枝淑郁麗芳遠悠颺風日遲南
國富嘉樹騷人留恨詞空齋對日夕愁絕鬢成絲

病告齋居作

層陰靄已布小雨時漂灑獨臥一窓間有懷無與寫高
居生遠興春物彌平野慮曠景方融事遠情無捨聊寄
茲日閒塵勞等虛假

感事有嘆

榮華難久恃代謝安可量宿昔堂上飲今歸荒草鄉高
臺一以傾總帳施空房繁絃既闕奏緩舞亦輟行桃李
自妍華春風自飄揚戀幄靡遺思更衣有餘芳身徂名
亦滅事往恨空長寄語繁華子古今同一傷

夏日

涼氣集幽樹清陰生廣庭偶茲憩煩燠忽憶郊園行
婉碧草滋迢遞玄蟬鳴官曹且休暇自適幽居情

聞蟬

悄悄山郭暗故園應掩扉蟬聲深樹起林外夕陽稀

秋夜歎

秋風淅瀝鳴清商秋草未死啼寒螿幽人幽人起晤歎
仰視河漢天中央河漢西流去不息人生辛苦何終極
蒼山萬疊雲氣深去鍊形魂生羽翼

茅舍獨飲

出身從吏役驅車涉窮山日落陰景晦天高風氣寒豈
無斗酒資獨酌誰為歡一盃且復醉百念中闌干

宿傳舍見月

空堂寒夜月華清，獨宿淒涼夢不成。
欲向堦前舞凌亂，手持杯酒為誰傾。

寄諸同寮

把酒江頭煙雨時，遙知江樹已芳菲。
應憐倦客荒茅裡，落盡梅花未得歸。

登羅漢峰

休暇曹事簡，登高志窺臨。
徜徉偶此地，曠望披塵襟。
落

日瞰遠郊暮色生寒陰歡娛未云已更欲窮幽尋行披
茂樹盡豁見滄溟深恨無雙飛翼徃詣蓬山岑

登面山亭

是日氛霧四塞
獨見雙髻峰

新亭夙所聞登眺遂茲日極目但蒼茫前瞻如有失煙
鬟稍呈露衆嶺方含鬱長嘯天風來雲散空宇碧

雙髻峰

絕壑藤蘿貯翠煙水聲幽咽亂峰前行人但說青山好
腸斷雲間雙髻仙

涉澗水作

幽谷濺濺小水通
細穿危石認行蹤
回頭自愛晴嵐好
却立灘頭數亂峯

試院即事

乙亥

端居惜春晚庭樹
綠已深重門掩晝
靜高館正陰沈披
衣步前除悟物懷
貞心澹泊方自適
好鳥鳴高林

借王嘉叟所藏趙祖文畫孫興公天台賦凝思
幽巖朗詠長川一幅有契于心因作此詩二首

翩然乘孤鶴，性至蒼崖巔。上有桂樹林，下有清冷淵。洗
心詠太素，汎景窺靈詮。棲身託歲暮，畢此巖中緣。

山空四無人，澗樹生涼秋。杖策忘所適，水木娛清幽。散
髮塵外颺，濯足清瑤流。靜歛長林內，舉翮仍丹丘。

雜記草木九首

高蘿引蔓長，挿援垂碧絲。西窓夜來雨，無人領幽姿。
冬

弱植不自持，芳根為誰好。雖微九秋榦，丹心中自保。
紅

根節含露辛苔頽扶援綠蠻中靈草多夏永清陰足

留扶

種竹官牆陰經年但憔悴故園新綠多宿幹轉蒼翠

竹

窈窕安榴花乃是西隣樹墜萼可憐人風吹落幽戶

榴花

春條擁深翠夏花明夕陰北堂罕悻物獨爾澹冲襟

萱草

一

西窓萱草藜昔是何人種移向北堂前諸孫時遶弄

萱草

二

端居春向殘夏氣已清穆睡起悄無人風驚滿窓綠

獨覺

晨起獨行園花藥發奇穎猶嫌墜露稀更汲寒泉并澆花
觀黃德美延平春望兩圖為賦二首

川流匯南奔山豁類天闕層甍麗西崖朝旦羣峰碧

劍閣

望南山

方舟越大江凌風下飛閣仙子去不還蒼屏倚寥廓

冷風

望演山

祠事齋居聽雨呈劉子晉

刀筆常時篋笥盈齋祠今喜骨毛清與君此日俱無事

共愛寒塔滴雨聲

考異

虞帝廟詞

沛皇

一作
仰皇

虞之

一作
韶之

灘之

一作
武之

感春賦

悵佳

一作
恨佳

吾心

一作
無心

空同賦

壁帶

一作
壁帶

招隱操

清商

一作
商歌

遠遊篇

問子何所之行矣戒闕梁世路百險艱出門

始憂傷東征憂暢谷西遊畏羊腸南轅犯癘

毒北駕風裂裳

一作願子雷所之行矣戒關
梁南棘犯癘毒北駕風裂裳

東征憂暘谷西遊畏羊腸
世路百險艱出門始悲傷

春日即事

緣原

一作緣源

古意

一作勸古

所依

一作所託

月適

一作月流

春日言懷

一作春日書懷

過武夸作

啓蒼

一作起蒼

八月十七夜月

竹林

一作故園

九日

湖海

一作江海

督役城樓

感此

一作感茲

寄黃子衡

重使

一作却使

懷山田作

色澹

一作色靄

安溪道中

忘倦

一作忘疲

征鞅

一作歸鞅

安溪書事

一作晚望

虛邑

一作井邑

涵山日欲

一作山深日已

窺閣

一作地迥

極目

一作目

借王嘉叟所藏趙祖文畫孫興公天台長川一幅

一作借王

嘉叟天台橫卷

洗心

一作凝神

澗樹


一作桂樹

長林

一作茲林

觀春望兩圖

朝旦一作朝夕



晦菴集卷一

欽定四庫全書

集部
晦庵集卷二

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣范來宗

謄錄監生臣李鳳丹

欽定四庫全書

晦庵集卷二

宋 朱子 撰

詩

送王季山赴龍溪

故人千石令便道此之官契濶三秋永逢迎一笑懼田園
知不遠謠俗問非難已想躬玄默鳴絃亦罷彈

之德化宿劇頭舖夜聞杜宇

王事賢勞祇自嗤一官今是五年期如何獨宿荒山夜

更擁寒衾聽子規

次韻傅丈題呂少衛教授藏書閣

西樓誰與共閒居
茂樹婆娑清晝餘
大隱祇今同一壑
行吟非昔似三閭
揣摩心事惟黃卷
料理家傳亦素書
更鑿寒泉供漱石
世紛不擬問焉如

次韵父韻

五字何人寄鰓鳴
滿袖金劇知多暇
日誰與共幽尋簿
領淹窮海鶯花遶
故林功名終好在
且莫負初心

次祝澤之表兄韻

裸裎相向但悠悠
信道乾坤日夜浮
此去安心知有法
向來示病不難瘳
優游靜室閒牕底
放浪東阡南陌頭
萬事何由到懷抱
夕陽芳草自春秋

次祝澤之表兄韻送劉子晉歸省

之子真吾友
心期到古人
慇懃來講學
迢遞遠思親
黃卷工夫妙
斑衣夢想頻
今朝首歸路
何處問知津

送祝澤之表兄還鄉

首夏何來此清秋却復歸應緣心未快豈是世相違落
日空書館涼風淨客衣功名須努力別淚莫頻揮

知郡傅文載酒僕被過燾於九日山夜泛小舟
弄月劇飲二首

扁舟轉空濶煙水浩將平月色中流滿秋聲兩岸生杯
深同醉極嘯罷獨魂驚歸去空山黑西南河漢傾

誰知方外客亦愛酒中仙共踏空林月來尋野渡船醉
醒非各趣心跡兩忘緣江海情何限秋生蓬鬢邊

教思堂作示諸同志

吏局了無事橫舍終日閒庭樹秋風至涼氣滿窓間高
閣富文史諸生時往還縱談忽忘倦時觀非云慳詠歸
同與點坐忘庶希顏塵累日以銷何必棲空山

再得古木

青山一何深上下盡雲木中有十歲姿偃蹇臥寒谷明
堂不徵材大匠肯回目樵斧莫漫尋從渠媚幽獨

示諸同志

夏木已云暗時禽變新聲林園草被徑端居有餘清端
居亦何為日夕掩柴荆靜有絃誦樂而無塵慮并良朋
肯顧予尚有夙心傾深慚未聞道折衷非所寧眷焉撫
流光中夜歎以驚高山徒仰止遠道何由征

示四弟

十日一洗沐諸生各歸休虛齋息群響兀坐心悠悠雨
久苔徑荒林深鳥啼幽階前樹萱草與子俱忘憂

還家即事

獻歲事行役徂春始還歸昔往草未芳今來翠成幃扶
踈滿園陰時禽互翻飛叢萱亦已秀丹葩耀晨輝即事
誰與娛淹留自忘機日暮復出門悵然心事違古人不
可見獨掩荒園扉

小盈道中

今朝行役是登臨極目郊原快賞心却笑從前嫌俗事
一春牢落閉門深

題囊山寺

曉發漁溪驛夜宿囊山寺雲海近蒼茫層嵐擁深翠行
役倦修途投歸聊一憩不學塔中仙名塗定何事

題九日山石佛院亂峯軒二首

因依古佛居結屋寒林杪當戶碧峰稠雲烟自昏曉
巖中老釋子白髮對青山不作看山想秋雲時泚還

題可老所藏徐明叔畫卷二首

羣峰相接連斷處秋雲起雲起山更深咫尺愁一里
流雲繞空山絕壁上蒼翠應有采芝人相期煙雨外

再至同安假民舍以居示諸生

端居託窮巷廩食守微官事少心慮怡吏休庭宇寬晨
興吟誦餘體物隨所安杜門不復出悠然得真歡良朋
夙所敦精義時一彈壺餐雖牢落此亦非所難

許生不
葷肉

六月十五日詣水公菴雨作

雲起欲為雨中川分晦明繞驚橫嶺斷已覺疎林鳴空
際旱塵滅虛堂涼思生頽簷滴瀝餘忽作流泉傾况此
高人居地偏園景清芳馨雜悄清俯仰同鮮榮我來偶

茲適中懷澹無營歸路綠泱泱因之想巖岬

末利

曠然塵慮盡為對夕花明密葉低層幄氷蕤亂玉英不
因秋露濕詎識此香清預恐芳菲盡微吟遶砌行

謝人送蘭

幽獨塵事屏腕晚秋蘭滋芳馨不自媚掩抑空相思晤
對日方永披叢露未晞脩然發孤詠九畹陳悲詩

又

淹留閱歲序契濶心懷憂獨臥寄僧閣一室空山秋徘徊起顧望俯仰誰為儔伊人遠贈問孤根亦綢繆芳馨不我遺三載娛清幽愧無瓊琚報厚意竟莫酬瞻彼南陔詩使我心悠悠

秋蘭已悴以其根歸學古

秋至百草晦寂寞寒露滋蘭臯一以悴蕪穢不能治端居念離索無以遺所思願言託孤根歲晏以為期

去歲蒙學古分惠蘭花清賞既歇復以根叢歸

之故晚而學古預有今歲之約近聞頗已著花
輒賦小詩以尋前約幸一笑

秋蘭遮初馥芳意滿冲襟想子空齋裏淒涼楚客心夕
風生遠思晨露灑中林頗憶孤根在幽期得重尋

秋夕二首

西齋坐竟日曠然誰與儔感茲風露夕始知天宇秋庭
樹且扶踈時物詎淹留心空累云遠歲月真悠悠

公門了無事吏散終日間涼葉何蕭蕭悲吟庭樹間琴

書寫塵慮菽水怡親顏憶在中林日秋來長掩關

秋夜聽雨奉懷子厚

悄悄窓戶暗青燈讀殘書忽聽疎雨落稍知涼氣初披
襟聊自適掩卷方躊躇亦念同懷人悵望心煩紆鳴琴
愛靜夜樂道今閒居岑岑空山中此夕知焉如

對月思故山夜景

沉沉新秋夜涼月滿荆扉露泣凝餘彩川明澄素暉中
林竹樹映疎星河漢稀此夕情無恨故園何日歸

同僚小集梵天寺坐間雨作已復開霽步至東
橋玩月賦詩二首

傑閣翔林杪披襟此日閒層雲生薄晚涼雨遍空地
迥衣裳冷天高澄霽還出門迷所適月色滿林闕

空山看雨罷微步喜新涼月出澄餘景川明發素光星
河方耿耿雲樹轉蒼蒼晤語逢清夜茲懷殊未央

梵天觀雨

持身之古節寸祿久棲遲暫寄靈山寺空吟招隱詩讀

書清磬外看雨暮鐘時漸喜涼秋近滄洲去有期

箕山閣雨中

兩山相接雨冥冥四牖東西萬木清面似凍梨頭似雪
後生誰與屬遺經

登閣

橫空敞新閣高處絕炎氛野迥長風入天秋涼氣分憑
欄生逸想投迹遠人羣終憶茅簷外空山多白雲

秋懷二首

金匱要略卷之二
卷二
秋風吹庭戶客子懷故鄉矧此卧愁疾徘徊守空房
佇想澗谷居林深慘悲涼鷓鴣雞感蕭辰拊翼號風霜氛
雜無留氣悄悄有餘芳幸聞衛生要招隱夙所臧終期謝
世慮矯翮茲山岡

懷痾坐竟日晚色散幽樹寂歷候蟲悲沆瀣碧草露端
居興方澹沉默自成趣羽觴歡獨持瑤琴誰與晤空知
玄思清未惜年華度美人殊不來歲月恐遲暮

中元雨中呈子晉

徂暑尚煩鬱大火空西流茲辰喜佳節涼雨忽驚秋晚
晚蘭徑滋蕭蕭前庭樹幽炎氣一以去恢台迹不留刀筆
隨事屏塵囂與心休端居諷道言焚香味真誨子亦玩
文史及此同優游

秋暑

晨興納新涼亭午倦猶暑卧對北窓扉淡泊將誰侶疎
樹含輕颺時禽轉幽語端居悟物情即事聊容與

和李伯玉用東坡韻賦梅花

北風日日霾江村歸夢正兩勞營魂忽聞梅藥臘前破
楚客不愛蘭佩昏尋幽舊識此堂古曳杖偶集僧家園
嵐陰春物未全到邂逅只有南枝溫冷光自照眼色界
雪艷未怯扶桑暎遙知雲臺溪上路玉樹十里藏山門
自憐塵羈不得去坐想佳處知難言但哦君詩慰岑寂
已似共倒花前罇

與諸人用東坡韻共賦梅花適得元履書有懷
其人因復賦此以寄意焉

羅浮山下黃茅村蘇仙去餘詩魂梅花自入三疊曲
至今不受蠻烟昏佳名一旦異凡木絕艷千古高名園
却憐冰質不自暖雖有步障難為溫羞同桃李媚春色
敢與葵藿爭朝暎歸來只有修竹伴寂歷自掩疎籬門
亦知真意還有在未覺浩氣終難言一杯勸汝吾不淺
要汝共保山林罇

挽劉寶學二首

天地誰翻覆人謀痛莫支公扶西極柱威動北征旗肉

食謀何鄙家山志忽齋平生出師表今日重傷悲
生死公何有飄零我自傷向非憐不造那得此深藏心
折風霜裏衣沾子姪行哦詩當肅挽悲哽不成章

寄題梅川溪堂

滄波流不極上有一畝園幽人掩關卧修竹何娟娟虛
堂面羣峰秀色摩青天靜有山水樂而無車馬喧人言
市門子徃徃蒼崖顛揮手謝世人日中翔紫煙遺跡尚
可覲神交邈無緣慨然一永歎耀靈忽西遷褰裳下中

止濯足娛清川

和劉抱一

幾年牢落舊村墟
此日儵然水竹居
病起試尋春逕草
客來聊煮雪畦蔬
開樽細說平生事
信手同繙集古書
適意何勞一千卷
新詩閑出笑談餘

再和

久矣投裝返舊墟
不將心事賦閑居
荷鋤帶月朝治穢
植杖臨風夕挽蔬
三逕猶尋陶令宅
萬籤聊借鄴侯書

木爪更得瓊琚報吟咏從今樂有餘

送芮國器二首

挂節千山外勤勞飽所經一心無適莫萬口自丹青拂
拭先賢傳光輝處士星活人功更遠試與問林垌

紫陌同年舊青雲得路新論心端有契下榻豈辭頻話
別驚如許相逢渺未因期公念經濟從此上星辰

梅花開盡不及吟賞感嘆成詩聊貽同好二首

憶昔身無事尋梅只怕遲沉吟窺老樹取次折橫枝絕

艷驚衰鬢餘芳入小詩今年何草草政爾負幽期
隼几冰壺在梅梢雪蕊空不堪三弄咽誰與一樽同鼻
觀殘香裏心期昨夢中那知北枝北猶有未開叢

宋文示及紅梅臘梅借韻兩詩輒復和呈以發
一笑

閒說寒梅盡尋芳去已遲冷香無宿蕊穠艷有殘枝正
復非同調何妨續舊詩廣平偏斌媚鐵石悞心期

宋文此篇

乃用施
朱粉事

悞一作悟

風雪催殘臘南枝一夜空誰知荒草裏却有暗香同質
瑩輕黃外芳騰淺絳中不遭岑寂侶何以媚孤叢

呈黃子厚

茅齋塵事遠幽獨興無窮永晝呻吟內新涼愁思中朱
顏非昨日綠鬢又秋風珍重牆東客遙憐此意同

奉酬子厚詠雪之作

遙夜不能寐披衣起彷徨仰視天正黑寒氣慘悲涼飛
霰忽下零雪花亦飄揚颺揚未云已須臾滿空翔前山

失舊淒川谷流素光念昔少小時無事志四方五年江
海上不見雪與霜飄飄今日情浩蕩誰能量凌晨飲一
杯竟日守空堂竚立玩竒變永言獲新章躊躇欲何報
玉樹生瓊岡

送籍溪胡丈赴館供職二首

祖餞衣冠滿道周此行誰與詰端由心知不作功名計
祇為蒼生未敢休

執我仇仇詎我知謾將行止驗天機猿悲鶴怨因何事

只恐先生袖手歸

寄籍溪胡丈及劉恭父二首

先生去上芸香閣
閣老新裁角冠留
取幽人卧空谷
一川風月要人看

甕牖前頭翠作屏
晚來相對靜儀型
浮雲一任閒舒卷
萬古青山只麼青

挽范直閣二首

獻納陪興運如公
衆所期憂時最
深切信道不磷緇
落

落歸來賦忽忽殄瘁詩菟裘當日計宰木後人悲
先友多名士存亡幾許人惟公且彊健於我更情親出
處論心晚音書枉誨頻素車今日會誰與共傷神

頃以多言害道絕不作詩兩日讀大學誠意章
有感至日之朝起書此以自箴蓋不得已而有

言云

神心洞玄鑒好惡審薰猶云何反自誑悶默還包羞今
辰仲冬節寤歎得隱憂心知一寸光昱彼重泉幽朝來

自茲始羣陰邈難留行迷亦已遠及此旋吾軸

仁術

在昔賢君子存心每欲仁求端從有術及物豈無因惻
隱來何自虛明覺處真擴充從此念福澤遍斯民入井
倉皇際牽牛穀觶辰向來看楚越今日備吾身

聞善決江河

大舜深山日靈襟保太和一言分善利萬里決江河可
欲非由外惟聰不在他勇如爭赴壑進豈待盈科學海

功難並防川患益多何人親祖述耳順肯同波

仰思二首

公德明光萬世師從容酬酢更何疑當年不合知何事
清夜端居獨仰思

聖賢事業理難同僭作新題欲自攻王事兼施吾豈敢
儻容思勉議成功

困學二首

舊喜安心苦覓心捐書絕學費追尋困衡此日安無地

始覺從前枉寸陰

困學工夫豈易成
斯名獨恐是虛稱
傍人莫笑標題誤
庸行庸言實未能

復齋偶題

出入無時是此心
豈知雞犬易追尋
請看屏上初文旨
便識名齋用意深

示四弟

務學修身要及時
競辰須念隙駒馳
清宵白日供遊蕩

愁殺堂前老古錐

克已

寶鑑當年照膽寒
向來埋沒太無端
祇今垢盡明全見
還得當年寶鑑看

曾點

春服初成麗景遲
步隨流水玩晴漪
微吟緩節歸來晚
一任輕風拂面吹

伐木

伐木相將入遠山共聽幽鳥語
闕闕殷勤若解當時意
此日那容不盡歡

春日

勝日尋芳泗水濱無邊光景一時新
等閒識得東風面
萬紫千紅總是春

春日偶作

閒道西園春色深
急穿芒屨去登臨
千葩萬蕊爭紅紫
誰識乾坤造化心

觀書有感二首

半畝方塘一鑑開，天光雲影共徘徊。
問渠那得清如許？為有源頭活水來。

昨夜江邊春水生，蒙衝巨艦一毛輕。
向來枉費推移力，此日中流自在行。

題西林院壁二首

觸目風光不易裁，此間何似舞雩臺。
病軀若得長無事，春服成時歲一來。

中屢脩然一鉢囊何妨且住贊公房却嫌宴坐觀心處
不奈簷花抵坎香

簷前有
柚花

題西林可師達觀軒

窈窕雲房深復深層軒俄此快登臨卷簾一目遙山碧
底是高人達觀心

再題

紹興庚辰冬予來謁隴西先生退而寓於西
林院惟可師之舍以朝夕往來受教焉閱數

月而後去可師始嘗為一室於其居之左軒
其東南以徙倚瞻眺而今鉛山尉李兄端父
名之曰達觀軒蓋取賈子所謂達人大觀物
無不可云者予嘗戲為之詩以示可師既去
而遂忘之壬午春復拜先生於建安而從以
來又舍於此者幾月師不予厭也且欲予書
其本末置壁間因取舊詩讀之則歲月逝矣
而予心之所至者未尺寸進焉為之三歎自

廢顧師請之勤勤不得辭於是手書授之而
又敘其所以然者如此雖其辭鄙陋若無足
稽然予之往來師門蓋未慙也異時復至又
將假館于此仰視屋壁因舊題以尋歲月而
惕然乎其終未有聞也然則是詩之不沒亦
予所以自勵者可師嘗遊諸方問佛法大意
未倦而歸尚有以識予意也三月九日熹書
古寺重來感慨深小軒仍是舊窺臨向來妙處今遺恨

萬古長空一片心

示西林可師二首

身世年來欲兩忘
一春隨意住僧房
行逢舊隱低回久
綠樹鶯啼清晝長

幽居四畔只空林
啼鳥落花春意深
獨宿塵龕無夢寐
五更山月照寒衾

感事書懷十六韻

鄰敵何年盛神州
遂陸沉翠華棲浙右
紫塞僅淮陰志

士憂虞切朝家預備深一朝頒細札三捷便聞音授鉞
無遺筭沈機識聖心東西兵合勢南北怨重尋小却奇
還勝窮凶禍所臨旃裘方舞雪血刃已披襟殘類隨燬
燼遺黎脫斧礮戴商仍夙昔思漢劇謳吟共惜山河固
同嗟歲月侵泉著久憔悴陵栢幸蕭摻正爾資群策何
妨試盍簪折衝須舊衮出牧仗南金衆志非難徇天休
詎可堪故人司獻納早晚奉良箴

次韻劉彥采觀雪之句

朔風吹空林眇眇無因依但有西北雲冉冉東南飛須
臾層陰合慘淡周八維凍雨不流澗飛花舞妍姿翳空
乍滅沒散影還參差萬點隨飄零百嘉潛潤滋徘徊瞻
詠久默識造化機上寒下必溫欲積無根基漸看谷樹
變稍覺叢篁低皓然遂同色宇宙乃爾竒繁華改新觀
凜冽忘前悲搗草愧佳友佇立迎寒吹感此節物好嘆
息今何時當念長江北鐵馬紛交馳

次韻彥采病中口占

一榻流年度篝燈遙夜闌短衾閒自擁清鏡莫頻看竹
窠初驚雪梅疎却耐寒從今花木夢無復在雕欄

感事

聞說淮南路烟塵滿眼黃葉軀慚國士嘗瞻念君王却
敵非干槽信威藉紀綱丹心危欲折竚立但彷徨

聞二十八日之報喜而成詩七首

戎馬無端莫四馳漢家元有中興期旃裘喋血淮山寺
天命人心合自知

天驕得意任驅馳
太歲乘蛇已應期
一夜旄頭光殞地
飲江鐵馬未全知

雪擁貂裘一馬馳
孫軍左袒事難期
秦函夜入明光殿

底事廬兒探得知

所報乃御營宿衛
官奏故有是句

渡淮諸將已爭馳
兔脫鷹揚不會期
殺盡凶殘方反旆
里閭元未有人知

漢節熒煌直北馳
皇家卜世萬年期
東京盛德符高祖
說與中原父老知

追鋒聞說日驅馳舊德登庸儻有期

張魏公

聖主聰明似

堯禹忠邪如許詎難知

恭惟大號久風馳清蹕傳呼却未期此日不須勞玉趾
寸心那得待臣知

次子有聞捷韻四首

神州荆棘欲成林霜露淒涼感聖心故老幾人今好在
壺漿爭聽鼓鼙音

殺氣先歸江上林貔貅百萬想同心明朝滅盡天驕子

南北東西盡好音

孤臣殘疾卧空林不奈憂時一寸心誰遣捷書來篋戶
真同百蟄聽雷音

敗北何殊免走林驕豪無復向來心莫煩王旅追窮寇
鶴唳風聲盡好音

奉陪判院丈充父平父兄宿回向用知郡丈壁
間舊題之韻

暮雨停驂處僧廬古道邊十峰環傑閣一水下平田行

役無期度經過幾歲年明朝須飽飯躡足上寒煙

感事再用回向壁間舊韻二首

江北傳烽火單于大入邊已聞隳列障不但擾屯田借
箸思人傑推鋒屬少年偷安慙暇食萬竈起愁煙

廊廟憂虞裏風塵慘淡邊早知煩汗馬悔不是留田迷
國嗟誰子和戎誤往年腐儒空感慨無策靜狼煙

蒙判院文示及再用元韻之作率易和呈以求

指誨

疇昔經行地溪山寂寞邊
冰霜凝巨壑風雨暗中田
古寺堪投晚塵龕閱紀年
論文寒夜永清絕裊爐烟

數日前與判院丈有宋村之約
雪中有懷奉呈判院通判二丈

雲垂天濶歲將闌一室翛然獨掩關
擁褐不知風折木開軒惟見雪漫山
玄空杳靄低迷外碧樹瓏璵掩映間
吟罷左思招隱句扁舟無路過長灣

次韻判院丈雪意之作

端居歲復窮閉戶守冲澹風陰原野悲月黑庭除暗淅
瀝靜先知崩奔誰與探坐想青瑤林寒光生素艷

熹伏蒙判院丈垂示用韻喜晴之句率爾奉酬

伏乞笑覽

客枕終難穩歸來歟息深曉雞回遠夢缺月掛空林冰
谷晨加帽晴窓晝解襟詩筒多妙語仍喜舊盟尋

登梅嶺

去路霜威勁歸程雪意深往還無幾日景物變千林曉

磴初移屐寒雲欲滿襟
玉梅疎半落猶足慰幽尋

雪意

向晚浮雲四面平
北風號怒達天明
寒牕一夜清無睡
擬聽杉篁葉上聲

昨夕不知有雪而晨起
四望遠峰皆已變色
再用元韻作兩絕句

朔風吹盡暮雲平
室暖爐紅睡達明
但怪朝來滿山白
不知昨夜打牕聲

千林無葉一川平萬壑瓊瑤照夜明未覺殘梅飄落盡
只愁羌管不成聲

奉陪彥集充父同游瑞巖謹次莆田使君留題
之韻

踏破千林黃葉堆林間臺殿藹崔嵬谷泉噴薄秋逾響
山翠空濛晝不開一壑祇今藏勝槩三生疇昔記曾來
解衣正作留連計未許山靈便卻回

伏讀趙清獻公瑞巖留題感歎之餘追次元韻

趙公名迹此猶微已薦行藏第一機直自當年留翰墨
至今窮谷尚光輝時清諫疏空遺橐歲晚高齋自掩扉
高齋公晚年所居每夕獨處一室使人徧其外云珍重九原如可作問渠何處
是真歸

伏讀二劉公瑞巖留題感事興懷至於隕涕追
次元韻偶成二篇

誰將健筆寫崖陰想見當年抱膝吟緩帶輕裘成昨夢
遺風餘烈到如今西山爽氣看猶在北闕精誠直自深

故壘近聞新破竹起公無路祇傷心

右懷寶學公作近聞西兵進取關陝

其帥即公

舊部曲也

投綬歸來卧赤城家山無處不經行寒巖解榻夢應好

絕壁題詩語太清陳迹一朝成寂寞靈臺千古自虛明

傳來舊業荒無盡慚愧秋原宿草生

右懷病翁先生作翁領崇道祠官故

有赤城之句

入瑞巖道間得四絕句呈彥集充父二兄

憶昔南遊桂樹陰歸來遺恨滿塵襟
監輿此日無窮思

萬壑千巖秋氣深

翩翩一馬兩肩輿
路轉秋原十里餘
共說前山深更好
不辭迢遞款禪居

清溪流過碧山頭
空水澄鮮一色秋
隔斷紅塵三十里
白雲黃葉共悠悠

風高木落晚秋時
日暮千林黃葉稀
祇有蒼蒼谷中樹
歲寒心事不相違

挽籍溪胡先生三首

夫子生名世窮居幾歲年聖門雖力造美質自天全樂
道初辭幣憂時晚奏篇行藏今已矣心迹故超然

澹泊忘懷久渾淪玩意深簞瓢無改樂山水自知音冊

府遺編在

公所定著論語
會義副在秘閣

丘原宰樹陰門人封馬鬣寒

日共沾襟

先友多淪謝惟公尚典型向來深繾綣猶足慰飄零喬
木摧霜榦長空沒曉星傷心遽如許孤露轉玲峴

次韻潮州詩六首

濠上齋二首

黃堂理事餘便空永茲日語默趣雖殊
晦明心本一舊聞真體露已嘆羣疑失
迨此復幾年定知久純白道若大路然
奈此人好徑即事昧本心離動覓真靜
安知濠上翁妙入玄中境偶寄郡齋閒
無欲民自正

閒坐

坐歎無餘事淡然塵慮稀
閒中自怡悅妙處絕幾微
韓子成今古顛師果是非
悠然發孤些千載儻來歸

銷寇

年來揭陽郡牢落海陰墟雲嶠無遺子潢池有跖徒單
車亦已稅蔓草不須鉏比屋絃歌裏功高化鱷圖

山丹

昔遊嶺海間幾見蠻卉拆素英溥夕露朱藹爛晴日歸
來今幾年晤對祇寒碧因君賦山丹悅復見顏色

山居即事用疊翠亭韻

世情日以疎庭樹日以密我心自悠悠兩忘喧與寂門

開山疊翠雨罷雲絕迹天涯此興同萬里寄消息

東舍姪

回頭別子時歲月劇風雨老大無所成慙嘆中夜舞長
鏡足呻吟短褐極藍縷古人不可期炯炯心獨苦

夏日齋居得潮州詩卷咏歎之餘用卒章之韻
以紀其事

孟夏氣淑清窓戶有佳色卧聞幽籜翻轉覺林景寂參
差帙委素縹緲香橫碧啜菽有餘懽纓冠非所職故人

海邊郡妙語寄遠翼咏嘆不得聞超然見宵臆

壽母生朝

下六首附
見於此

秋風蕭爽天氣涼此日何日升斯堂堂中老人壽而康
紅顏綠髮雙瞳方家貧兒痴但深藏五年不出門庭荒
竈墜十日九不煬豈辨甘脆陳壺觴低頭包羞汗如漿
老人此心久已忘一笑謂汝庸何傷人間榮耀豈可常
惟有道義思無疆勉勵汝節彌堅剛熹前再拜謝阿娘
自古作善天降祥但願年年似今日老萊母子俱徜徉

又二首

敬為生朝舉一觴
短歌罷意偏長
願言壽考宜孫子
綠鬢朱顏樂未央

陰澹園林歲欲霜
怪來和氣滿中堂
要知積善工夫巧
變得人間作壽鄉

又三首

昨夜秋風涼氣歸
今朝喜色動簾幃
細斟漱澀新春酒
戲舞斑斕舊綵衣
願上龜蓮千歲壽
永令鳧藻一家肥

也知厚德天應報更說陰功世所希

暑退秋容欲凜然北堂佳氣倍澄鮮舊痾已向新涼失
壽骨應隨爽籟堅塵外光陰那有盡尊前風月浩無邊
痴兒六六今如許慙愧西河不老仙

仙人昔住紫琳房一旦飄然下大荒久悟客塵無自性
故應福祿未渠央徙居邂逅成嘉邈捧檄因循愧漫郎
願借寒潭千丈碧年年此日奉華觴

又一首

竹栢交柯庭院清西風不動翠簾旌高堂正喜新涼入
樂事仍逢壽筭傾盡室丹衷歸善禱滿頭綠鬢定重生
年年此日歡娛意更願時豐樂太平

丁丑冬在溫陵陪敦宗李丈與一二道人同和
東坡惠州梅花詩皆一再往反昨日見梅追省
前事忽忽五年舊詩不復可記憶再和一篇呈
諸友兄一笑同賦

江梅欲破江南村無人解與招芳魂朔雲為斷蜂虻信

凍雨一洗烟塵昏天憐絕艷世無匹故遣寂寞依山園
自欣羗笛娛夜永未要鄒律回春溫連娟窺水墮殘月
的礫泣露晞晨暉海山清游記玉面衰病此日空柴門
相逢不敢話疇昔能賦豈必皆成言雕鐫肝腎竟何益
况復制酒哦空樽

歲晚燕集以梅花已判隔年開分韻賦詩得已
字

陽愆冬氣昏日暮悲風起晤言欲誰從斗酒會隣里盤

餐乏珍脆肴核闕儲峙無以奉嘉賓竝聲亦可恥所賴
數子賢深睠不余鄙夜闌更促席燈火共歡喜酣歌氣
激冽傑句韻清美衰懶愧英游歲晚情何已

卓國太夫人生朝

鳳凰山下鳳凰城十載重來雙眼明賸喜故人頻獻納
足知賢母外榮名生朝舉酒天香裏賤子當歌魯頌聲
問訊豪眉今幾許年年此日照人清

又一首

玄冬周四運肅氣驅煩喧孕此貞秀質德美難具論魏
魏北堂高福履神所敦晨昏極榮養夙昔蒙天恩明年
啓國封屈狄文魚軒斑衣結紫綬玉樹承金尊歡娛何
所忘千載如飛奔惟應玄中趣眇眇自本根洗心河漢
津入此無窮門超然謝衆甫永與天壤存

社後一日作

聖作重品節等殺古所詳里有秦社稷僭差遂無章王
綱諒已隳精意尚不亡尚論千載前簡編有遺芳侃侃

陳孺子恂恂萬春鄉敬恭事耆老禱賽謹田桑悠悠我
里居歲事有故常向來諸老翁悖龐亦端莊交神度或
享與物同樂康今我胡不樂悵然下頽岡古人不可見
今人自猖狂

三月三日祀事畢因修禊事于靈梵以高閣一
長望分韻賦詩得一字

逝川無停波歲月一何疾居然雨露濡我意日蕭瑟共
惟西山足宰樹久蒙密晤言起衰敬時事該禮律有羞

既紛羅薦饋亦芳苾周旋極悽愴俛仰詎終畢更衣適
精舍鄰曲會茲日蓋黍界輝炮從容罄骨腓嘉賓更盤
礴環堵窺逸筆即事君獨哦非才我何述矧茲衰病餘
苦畏煩慮怵賦罷掩寒棲存存常抱一

夏日二首

端居倦時暑竟日掩柴門窓風遠颯至竹樹清陰繁靜
有圖史樂寂無車馬喧茲焉愜所尚難與世人論

季夏園木暗窓戶貯清陰長風一掩苒衆綠何蕭摻玩

此消永晝冷然滌幽襟俯仰無所為聊復得此心

汲清泉清竒石置熏爐其後香煙被之江山雲
物居然有萬里趣因作四小詩

晴窓出寸碧倒影媚中川雲氣一吞吐湖江心渺然
一水渺空濶羣山中接連寒陰白霧湧飛度碧峰前

隱几對寒碧忘言心自閑豈知宜寂士滅跡青峯間

杜詩

滅跡君山湖
上之青峯

吟餘忽自笑老矣方好弄慨然思古人尺璧寸陰重

偶題三首

門外青山積翠堆
幅巾終日面崔嵬
只看雲斷成飛雨
不道雲從底處來

壁開蒼峽吼奔雷
萬斛飛泉湧出來
斷梗枯槎無泊處
一川寒碧自縈回

步隨流水覓溪源
行到源頭却惘然
始悟真源行不到
倚筇隨處弄潺湲

次張彥輔韻

風霜歲云徂塵事昧雙目故人書鼎來照眼一連玉把
玩不知疲日宴坐空腹卷藏什襲秘寒光夜穿櫛嗟予
骯髒姿十駕不能速邱壑聊自娛簞瓢亦云足君侯湖
海士逸氣謝追逐胡為不予鄙乃肯顧林谷高軒緩前
期清夢遶雙竹起將杜陵句寫寄玉川屋我窮詩未工
最覺貂難續感君殷勤意吟苦屢更燭羣公饒藻思裂
牋動盈束歷險正推轡爭先哦擊轂低回欲引避悵望
曷歸宿出叻竟無竒彊顏終自慙北風催歲年兩鬢失

新綠樊生念學稼曹子悲食粟死灰寧復然寡過良所
欲耿耿自知明何勞磨尹卜

次張彥輔賞梅韻

朔風萬里開雲屏清霜夜墜朝景晴南枝浩蕩正春色
凍藥的礫含空明花邊偶對青銅鏡搞項不堪冰雪映
擁爐獨坐只悲吟振策出遊舒遠興暗香何處時一飄
行行復值最長條仰頭欲折渺誰贈滿意相思那得邀
極知異縣淹行李心賞未甘輕付畀石雄賦罷不相聞

秀野書來因舉似兩翁句法爭新奇畫出踈影沉寒漪
幽探自出塵境外勝槩未許兒曹知祇今嚼蘂攀條處
他日重來記前度風臺月觀悄無言玉苗冰灘索同賦
嗟予衰懶倦將迎過眼紛紛無復情尚喜疎英窺水白
更憐落片點苔青興來亂挿飛蓬首擬向君家醉君酒
酒酣耳熱莫狂歌布鼓雷門須縮手

借韻呈府判張丈既以奉箴且求教藥

一生江海迥無儔材大應容小未周景好身閒真復樂

酒酣耳熱却堪憂飛騰莫羨摩天鵠純熟須參露地牛
我亦醒狂多忤物頗能還贈一言不

家山堂晚照效輞川體作二首

夕陽浮遠空西峯背殘照爽氣轉分明與君共晚眺
山外夕嵐明山前空翠滴日暮無與期閑來岸輕幘

即事有懷寄彥輔仲宗二兄二首

一水方涵碧千林已變紅農收爭暖日老病怯高風徒
倚非無計心期莫與同向來歡會處離合太匆匆

聞說雙飛槩翩然下廣津江湖知子樂魚鳥諒情親淹
速須闕命行藏不繫人三山雖好在惜取自由身

次知府府判二丈韻三首

兩公清廟瑟窈窕拂朱絲事紀一朝勝名從千古垂流
傳當共賦惆悵不同時且要君頤解寧辭匡說詩

憶昨中秋夕寒盟約重尋幔亭權舉酒江閣快論心月
墮俱忘起壘空始罷斟祇今十嶺隔悵望一何深

武夷之遊

張王二丈元履子厚及熹與焉江閣之集子衡
移具知府丈亦賜臨屈此詩併簡同會諸公云

志士懷韜畧奇兵吼鏑干闕河那得往肝膽不勝寒壯

節悲如許雄圖渺未闢皇輿方仄席陋巷敢求安

得浙中知

舊書云聖上留意武備諸郡練卒皆點名閱武賜齋有加戎士感奮

巢居之集以中有學仙侶吹簫弄明月為韻探

策賦之而熹得中字遂誤為諸君所推高俾專

主約既而賦詩者頗失期於是令最後者具主

禮以當罰乃稍集獨敷夫圭甫違令後至衆白

罰如約飲罷以蒼茫雲海路歲晚將無獲分韻

熹得將字而子衡兄得蒼字實代熹出令

一昨樓上飲所歡不可忘羣公各賦詩佩玉何鏘鏘二
子朱絲絃掩抑獨叵量經營久不作一奏聲滿堂巧遲
未足多譴負先取償主盟謬夙推否德愧莫當茲焉不
舉法何以存令章劉子具盤食魏子輸壺漿悠然復一
醉歸路相扶將

昨承諸兄臨辱不揆以薄酒蔬食延駐都騎明
日視壁間所張墨刻有亡去者人以為德慶丈

之度也馳問遣索蒙需拙詩輒賦所懷往奉一
笑而尊健刻可以歸於我矣

歲暮霜霰集賓友從我遊置酒臨高齋觴酌屢獻酬雞
黍盤中庖肴核供庶羞所恨乏珍肥懼意不得周何悟
上客懷徒我夜壑舟平明但素壁篆刻不可求究索勞
象罔高蹤希盜丘我亦慚仲子獨未忘輕裘

昨以詩徵亡碑於四十一丈既蒙酬和而諸兄
亦繼作焉聯為巨編藏之中筭雖所亡古刻不

可復得而此之所獲則已多矣顧其中猶有不
能釋然者因念吾子厚隸法妙古人當為我大
書偉辭於壁庶以焜耀區區之望彼死鬼之陳
迹其存亡蓋不足為重輕也次韻見意云

端居感物化悵恨不出遊賦詩往追亡顧得離佩酬結
綬光陸離緼袍非所羞終然抱耿耿尼父悲東周淒涼
尊健崖望想滄浪舟低徊不得去寂寞將焉求安知崔
蔡徒考槃共斯丘為我揮素壁報君當紫裘

少陵詩蔡
裘隨劍几

義取無虛歲謂
李邕受潤筆資

再賦解嘲

宇宙一瞬息人生等浮遊云何百年內萬變紛相酬顛
倒不自知旁觀乃堪羞拱揖尚虞夏干戈到商周豈悟
曠士懷泛若不繫舟駟馬諒弗視名高非所求彼哉夸
奪子逝矣崑崙丘蹇裳絕冥外天風舞雲裘

嘉受碑于
共父以禮

諫四十一丈取之於嘉則
有懃德矣故有商周之語

題祝生畫呈裴丈二首

近代丹青手心期良獨難夫君偏有思妙處却無端堂
上三湘遠人間五月寒空囊今有此不用一錢看
斗酒淋漓後顛狂不作難千峯俄紙上萬景忽豪端石
瘦岡巒古林深煙雨寒蒼茫無限意俗眼若為看

挽延平李先生三首

河洛傳心後毫釐復易差淫辭方眩俗夫子獨名家本
本初無二存存自不邪誰知經濟業零落舊烟霞
聞道無餘事窮居不計年簞瓢渾漫與風月自悠然灑

落渡溪句從容洛社篇平生行樂地今日但新阡
歧路方南北師門數仞高一言資善誘十載笑徒勞斬
板今來此懷經痛所遭有疑無與折揮淚首頻搔

用西林舊韻二首

一自籃輿去不回故山空鎖舊池臺傷心觸目經行處
幾度親陪杖屨來

上疏歸來空皂囊未妨隨意宿僧房舊題歲月那堪數
慙愧平生一瓣香

考異

次韻李少衛藏書閣

茂樹

一作
藝樹

次祝擇之韻

靜室

一作
淨室

九日山夜泛舟

轉空

一作
漾空

情何

一作
清何

教思堂作

橫舍

一作
齋舍

秋生

一作
秋來

示諸同志

餘清

一作
餘情

示四弟

一作
休日

兀坐

一作
默坐

心悠

一作
真悠

還家即事

互翻

一作共翻

悵然

一作快然

獨掩

一作日掩

題囊山寺

蒼茫

一作蒼黃

題可老所藏畫卷

羣峰

一作羣山

詣水公庵雨作

雲起

一作雲氣

謝人送蘭

厚意

一作悟歎

寄題梅川溪堂

人言

一作今古

再和劉抱一

猶尋

一作獨尋

復齋偶題

豈知

一作豈如

示四弟

清宵

一作清陰

遊蕩

一作遊蕩

堂前

一作堂頭

春日偶作

色深

一作已深

觀書有感

一作雜詩
一作絕句

問渠那得清如許

一作怪來澈
底清無滓

江邊

一作江頭

枉費

一作幾費

感事書懷

間音

一作同音

共惜

一作共措

間二十八日之報

忠邪

一作羣臣

恭惟

一作恭聞

次子有間捷

不奈

一作無奈

感事

江北傳烽火

一作烽火傳江北

推鋒

一作堆鋒

暇食一作飽食

留田一作屯田

登梅嶺

玉梅一作野梅

雪意

浮雲一作愁雲

達天一作徹天

讀二劉公瑞岩留題

慙愧一作悵望

瑞岩絕句

風高一作霜清

黃葉一作紅葉

東舍姪

一作東舍姪

再和東坡惠州梅花詩

記玉一作識玉

卓國太生朝

所忘一作所至

社後一日作

耆老

一作耆年

惇龐

一作淳龐

靈梵分韻

蕭索

一作蕭瑟

夏日

永晝

一作永日

汲清泉作

湖江

一作湖山

偶題

青山

一作南山

家山堂晚照

與君共

一作為君共

次知府府判韻

約重

一作得重



晦庵集卷二